

REGIONAL NEWS

HEADLINES:-

1. Chief Minister Pu Lalduhomaan industry tenau te tichak tura hmalakna Raising and Accelerating MSME Performance (RAMP) a hawng a, Facilitation Cell a hawng bawk.
2. School Education Minister Dr Vanlalhlhlanan school 340 dinhmun chawikan tura thutlukna a siam chu thiatin enthat leh an tum a ti.
3. Prime Minister Narendra Modia chuan vawiin khan Bihar-a Rajgir-a Nalanda University Campus sak thar a hawng.
4. Delhi khawpui chuan tui lamah harsatna a tawk chhunzawm zel.

<><><>

RAMP

Chief Minister Pu Lalduhomaan industry tenau te tichak tura hmalakna Raising and Accelerating MSME Performance (RAMP) a hawng a, Facilitation Cell a hawng bawk.

Aizawl Vanapa Hall-a a hawwnaah thusawiin Chief Minister chuan, covid19 hripui vang khan Industry ten harsatna an tawk nasa a, heng ndustry te hian chak zawka hma an lo sawn leh theih nan Central sawrkar chuan RAMP a duang a ni. State te chu mahni mamawh ang zawnga guidelines duan a phalsak angin a hmng pawh hi MSME Elevate Mizoram (MEMiz) tiin vuah a ni a ti.

Industry neihsa leh ding chho zel tur ten tangkai taka an chhawr turin Facilitation Cell din a ni bawk tih sawiin India ram economy za zela 30 vel hi small scale Industry te thawhchhuah a ni a, hna thawktu zaa 46 vel te hi small scale a thawk te an ni bawk a. Chuvang chuan anni pawhin Hand Holding Policy leh heng central scheme te hi kaikawpin nasa takin hma an la dawn a ti.

RAMP bakah hian MEMiz website leh MSME Facilitation Cell te Chief Minister hian a hawng a ni.

Commerce & Industry Minister Pu F. Rodinglana, pawhin thusawiin, ngaihtuahna thar pua Mizote hian thil an tih a ngai a. Kamding nih aiin Mahni kea ding nih rilruk ngam a tul tawh a, midangte thuhnuaia awm lova mahni thu anga hnathawhna, pension awm ve lo, tu leh fate thlenga chhawm theih eizawna a ni a ti. Entrepreneurship chu uar takin an kalpui dawn a, a tul angin Dan te pawh an ennawn ang a, Industry te mamawh power siam chhuah thlengin an bei zel dawn a ni, a ti.

Tunah hian MSME sumdawna unit 34900 vel Mizoramah an awm mek a, a zatve aia tam te hian Udyam registration an la nei lo a ni.

<><><>

YOGA

Kumin Internation Day of Yoga(IDY) zirtawpni a hman tura tih chu inbuatsaihna kalpui mek zel a ni a.

IDY 2024 inpuahchana chungchangah hian Akashvani Corr in Ayush Dy Director Dr S. Mara Thansiami a kawmnaah Yoga chu fitness atana pawimawh tak a nih thu leh taksa hriselna ngaih pawimawh a ngai a ni tih a sawi a. Naupang atanga puitling, raipur thlengin yoga exercise a awm thu a sawi a ni.

Hun bi nei taka taksa sawizawi chu rilru hriselna atan a pawimawh a, ruihhlo laka fihlim tur chuan taksa uluk a that thu a sawi a. Hriselna ngaih pawimawh a that thu leh kan nun danin a kentel natna tamtak do tur atan Yoga chu a tha a ni, a ti a. Drugs keng tel lo damdawi anih thu leh Yoga hmanga enkawl dam theih a awm a. Yoga that bikna chu breathing technique a tel thu leh mihring taksa hriselna a pui nasa em em a. Hlau mai lovin kan rilru leh taksa hriselna atan Yoga ngai pawimawh a tul thu a sawi bawk a ni.

Tun dinhmunah Ayush hnuaiah hian Instructor 12 an awm mek a, heng Instructor te hi District Hospital, Integrated Ayush Hospital, Thenzawlah te rawn theihin an awm mek a. Yoga Instructor awmlohna hmunah pawh Ayush Doctor te Yoga exercise chungchangah rawn theihin an awm mek a. Administrative Training Institute leh Ayush Dept tangkawpin trainees chi hrang hrangte hnenah Instructor pakhat kaihhruaina in 'Yoga Exercise' kalpui mek a ni bawk .

Kumin International Day of Yoga (IDY) hi khawvel hmun dangte rualin zirtawpni hian Mizoramah hman a ni anga, a lawmna pui ber Hawla Indoor Stadium, Republic Vengthlangah hman tum a ni.

<><><>

EDUCATION MINISTER

School Education Minister Dr Vanlalhlana nikum Sept ni 27-a Council of Ministers thukhawmin school 340 dinhmun chawikan tura thutlukna a siam chu thiatin enthat leh an tum a ti.

He thu hi vawiina a office chamber-a chanchinbu mite a kawmnaah sawiin Pu Vanlalhlana chuan school upgradation hi kalpui an tum tak tak takah Mizoram sorkar dan zam te an enchiang a, amaherawhchu heng dan te hi sorkar hmasa Council of Ministers meeting in hman theih loh khawpin a siam a, dan an siam chu a inkalh tlat avangin, school 340 dinhmun hlankai tur zinga tehnaa tling chauh hlankai turin ngaihtuah that leh tura chhawp chhuah a ngai a ni a ti a, sorkar hmasa chuan inthlan dawna tlin duh luat avanga he thil hi a ti ni ngeia ngaih a ni a ti bawk.

Pu Vanlalhlana chuan sikul dinhmun chawikan tur zingah a phu tak tak te chu chawikan tura kalpui chhonzawm sak an nih dawn laiin, danin a phut anga building pawh neilo, result nei chhe lutuk te leh skul naupang nei tlem lutuk skul te thlauhthlak a ngai dawn a ti a, hengte hi tang leh zual sauh sauh tura an duh thu a sawi a ni.

Sikul dinhmun chawikan tur te hi siamfel a ni lo a, dinhmun hlankai tur sikul zingah pawh ngaihnamna engchinngae kalpui tur tih pawh ngaihtuah leh tur a ni a ti a, sikul 340 hlankai tur zingah hian an tlin vek dawn loh avangin zirtirtu, chungkua leh khawtlang hrilhai an awm pawh a rinawm a, amaherawhchu heng sikul te hian tan an lak lehzual a ngai dawn a ni a ti.

School Education Minister chuan, sikul zingah result nei thalo te chu insawifiah turin an hriattir tih sawiin heng zingah hian an hriat chinah pawh harsatna ril tak nei te, zirtirtu awmluh avang te leh thildang tam tak a nih thu a sawi a, heng sikul te hi an mamawh dan a zirin an puih dawn thu a sawi bawk a, zirtirtu indaihlohna sukiang tur hian hma an la ngei ngei dawn a, sawnkual ngai pawh sawnkual ngei ngei an ni dawn a ni a ti.

<><><>

HORTICULTURE FAIR

Horticulture Minister Prof. Lalnilawma chuan kuthnathawktu te chu an thawhpuite an ni a ti a.

He thu hi vawiina Aijal Club Park-a Horticulture Fair 2024 a hawannah sawiin Minister chuan Horticulture Fair buatsaih thin a ni chu lawmawm a tih thu a sawi a. Dept leh kut hnathawktute hnathawh phochhuahna hun tha siam a nih avangin dept leh kut hnathawktu hnathawh leh hmalakna mipui te'n an hriat phah a ni a ti a, thawh hona tha zawk a thlen thu a sawi a, kuthnawktu te chu sawrkar thawhpui chhonzawm zel turin a sawm nghal a ni.

Horticulture Fair hi kum 2012 atanga bul ÷an niin stall neitu te'n an hralh chhuah tawh zat chu cheng vbc 3 nuai 19 sing 4 vel niin kuminah hian stall chi hrang hrang 202 an awm a ni.

Horticulture Fair, 2024 hawna inkhawm hi Horticulture Dept Secretary Pi K. Lalrinzualin a kaihruai a, Horticulture lama kuthnathawk tha te tana lawmman sem a ni.

<><><>

LADC

Lai Autonomous District Council a Congress leh MNF thawhdunna chu rinawm takin MNF party chuan a kalpui dawn tih MNF Gen Hqrs a Senior Vice President Dr.R.Lalthangliana'n a sawi.

He thu hi vawiina Lawngtlai Press Club a chanchinbu mite a kawmnaah Sawiin Dr.R.Lalthangliana chuan LADC ah Village Council inthlanpui neihtur leh Lawngtlai Chandmary MDC by election neihtur ah mipuiten ngaihtuahna tak tak an sen tul a tih thu a sawi a. VC inthlan bikah chuan Political Party ang zawnga na taka kal chu khawtlang tan a thaberlo thei tih sawiin, State a rorellai apiang bawh ngawt hi khawtlang tan thil thaber a nihloh theih vangin mipui ten mitha thlangchhuak tura ngaihtuahna fim an hman tul a tih thu a sawi.

Lawngtlai Chandmary MDC by election neihtur ah MNF leh Congress chuan thawhdunna thuthlung siamin MNF Candidate chu Candidate intawm atan pawmin lungrual takin ke an pen tih a sawi a, LADC ah Congress leh MNF thawhdunna chu Chandmary bial MDC by election chuan a sawi danglam dawnlo tih sawiin, an khingpui ten MNF thlantlin a nih chuan LADC Sorkar ah an thawhpui Congress MDC thlauhthlaa MNF hlang Sorkar piang maitur anga sawi chu MNF rilru puthmang a nilo tih sawiin, MNF Party chuan Congress nen an thawhdunna chu zahtakin vawngchim turin theihtawp a chhuahzel dawn a ni a ti.

Dr.R.Lalthangliana hi Dampa bialtu MLA Pu Lalrintluanga Sailo leh Dy.Speaker hlui Pu H.Biakzaua bakah Pu K.Riachho leh MNF Dist. Hqrs Lawngtlai hruaituten an tawiawm a ni.

<><><>

ASF

Vawin khan Animal Husbandry and Veterinary Dept chhinchhiah danin Mizoramah vawk pulhri -African Swine Fever (ASF) vangin vawk 343 thiin vawk 436 suat a ni a.

ASF vang hian Mizoramah kumin January thla atanga vawin thleng khan vawk 2700 thi nia record a ni a, vawk suat tawh zawng zawng hi 5397 a ni tawh a. Vawin bika vawk thi zat hi Aizawl District ah vawk 372 a ni a, Serchhip District

ah 10 leh Kolasib ah 3 a ni a. Tihian vawiina Mizoram chungah vawk thi zat hi 343 a ni a.

Vawiin vek khan Mizoram chungah vawk suat zat chu 436 a ni a. Aizawl District ah vawk 576 suat a ni a, Mamit District ah vawk 146, Serchhip District ah vawk 72 leh Kolasib ah vawk 14 suat a ni bawk a ni.

<><><>

RUN FOR HEALTH

Mizoram Ṭhalai Kristian Pawl (TKP) rorel vawi 71-nain “Hriselna chungchanga Ṭhalai ten hma an sawn theihnan hma lak ni se” a tih umzuina hmasa ber atan tukin khan Mizoram chungah leh pawna ṬKP member ten ‘HRISELNA ATAN-TLAN’ tih hun an hmang a.

Aizawl ah chuan Aizawl Area ṬKP buatsaihin Aizawl khawpui chungah Pastor Bial 10 ten a huhovin hun an hmang a. Health Minister Pi Lalrinpui chuan Vanapa Hall ah hun hman puiin ṬKP kal khawm te hnenah hriselna pawimawh zia leh taksa insawizawi a ṭhat zia sawiin ṬKP member tlan te Vanapa Kawt atangin a vai liam a ni.

Minister in Vanapa Hall kawt aṭanga a vai liam hi hmun hnih ah inṭhenin tlan a ni a, Chhim lamah Sikulpuikawn thleng leh hmar lamah Chanmari kawm thleng tlan a ni.

He hun hmanna pui ber hi Lunglei Tennis Court hluiah neih a ni a. MTKP Vice President F. Lalremruatpuia, chuan hun a kaihruai a, MṬKP President Upa R.Lalrochama`n hunserh a hmang a. Secretary Rev. F. Zorinkhuma chuan kalkhawmte chu hriselna kawnga hma an lakna tura intiamtirna hun a hmang bawk.

He hunah vek hian Healthy Lunglei Campaign aṭangin Screening Non-Communicable Diseases (NCD) neih niin ṬKP member a duh apiang tan screening hi neih chhonzawm nghal a ni bawk a.

Lawngtlaiah chuan Areopagy ah hun hman a ni a. LATKP Senior Adviser Upa V. Renhsanga chuan hunserh hmangin, Rev. David Lalmalsawma, Lawngtlai North Bialtu Pastor chuan fuihna thu a sawi a ni.

‘Hriselna atana- tlan’ hun hi Mizoram chungah leh pawna Bial ṬKP leh Unit ṬKP ten anmahni remchan dan angin an hmang bawk a ni.

<><><>

PM

Prime Minister Narendra Modia chuan vawiin khan Bihar-a Rajgir-a Nalanda University Campus sak thar a hawng. Thusawiin Pu Modia chuan kum 2047-a ram changkanga India siamna kawngah hriatna chu a pawimawh hle a ti a. Zirna leh thiamna ti chak chu India-in khawvel ram thiltithei a nih ve theihna tura hmanraw pawimawh tak a ni a ti a. Sawrkarin khawvel zirna hmunpuiah India chu siam an tum tih a sawi bawk a ni.

Vawiina Campus hawna inkhawmah hian External Affairs Minister S. Jaishankar, Bihar Governor Rajendra Arlekar, Chief Minister Nitish Kumar, Deputy CMs Samrat Choudhary leh Vijay Sinha bakah sawrkar mi paiwmawh tak tak an tel a. Ram 17 atangin Nalanda University Ambassador te an lo tel bawk a ni.

<><><>

DELHI

Delhi khawpui chuan tui lamah harsatna a tawh chhonzawm zel. Tui chawh turin tanker bulah thui tak tak mipui an intlar a. Veng tam takah chuan tui harsatna avangin mipuiin buaina an tawh a. Hetihlai hian he tui harsatna avang hian hmun engemawzatah lungawilohnate chhuakin politics lamah inbeihna a nasa hle a ni.

NDMC pawh tui harsatna hian a nghawng pha a. NDMC Vice Chairperson Satish Upadhyay chuan Delhi sawrkar chu tanker mafia te venghimah a puh a ni.

Hetihlai hian Delhi sawrkar chuan Haryana-a BJP sawrkar chu na taka bein Delhi-a tui supply ti khaihlahkah a puh a. Politicsa inbeihna niin an puh a ni.

<><><>

DELHI CM

Delhi Court chuan Delhi Chief Minister chu July ni 3 thleng Judicial Custody-a awm chhonzawm turin a ti. Pu Khejriwal bakah hian Delhi Excise Policy thubuaia man ve tho Vinod Chauhan pawh July ni 3 thleng judicial custody a awm turin a ti bawh a. An pahnih hian Tihar Jail ah dah mek niin vawiin Khan Court hmaah Video Conference kaltlangin an inlan a.

Arvind Khejriwal hi March ni 21 Khan man a ni a. ED case ah hian mi 38 man an ni.

<><><>